

Sawce madame.

Take sawge, persoly, ysop, saveray,
 Onyons gode, peres, garlek, I say,
 And grapes; go fille þy gose þenne
 And sew þy hole, no grece oute renne;
 Lay hur to fyre and rost hyr browne,
 And kepe þo grece þat falles doune.
 Take galingale and þo grece þat renne,
 Do hit in posnet, as I þe kenne;
 Whenne þo gose is rostyde, take hir away,
 Smyte hir in pesys, I þe pray;
 Þat is within, þou schalle take oute,
 Kest in þy posnet with outene doute;
 Ȝif hit is thyke do þerto wyne,
 And powder of galingale þat is fyne,
 And powder dowce and salt also;
 Boyle alle togeder er þou fyr go,
 In a dysshe þy gose þou close
 Þe sawce abofe, as I suppose.

Gose in a Hogge pot.

In pesis þou schalle þy gose stryke,
 Take water and wyne bothe ilyke;
 Do in þy gose; and onyons þou take
 A gode quantité, as I er spake,
 And erbus hacked þou take also,
 And cast þou in er þou more do;
 Þen set þy pot over þo fyre,
 And hit wele stir for þe hyre;
 And make a lyoure of brede and blode,
 And lye hit perwithe, for hit is gode;
 Kast powder þerto and salt anon,
 And messe hit, þenne þou hase done.